


欽定八旗通志

人物志

卷一百一十二



欽定八旗通志卷一百九十二

人物志七十二

大臣傳五十八

漢軍鑲黃旗四 范時崇 施世綸 施世源 楊三春 高其倬

郝玉麟 范時捷

范時崇

范時崇漢軍鑲黃旗人大學士文程孫福建總督

承謨子也承謨殉耿逆之難時崇以密入監讀書

康熙二十三年授遼陽州知州二十八年遷廣西

梧州府同知二十九年調南寧府同知三十一年
遷直隸順德府知府三十三年調宣化府知府三
十六年遷天津道四十年擢貴州按察使尋調福
建按察使四十三年遷山東布政使四十四年擢
廣東巡撫四十五年七月疏言高州府吳川縣屬
硇川一島原有田糧戶口載在版籍自康熙元年
遷界戶遷田廢丁糧豁免無徵二十三年展界又
因孤懸海外仍未給民耕種近奉

旨酌改沿海營制硇川島已設專汛遷民來歸故土已有
譚福琰等九十餘家呈請復業應查明原額錢糧
戶口聽開墾陞科下部議行十月

上以兩廣額定鹽稅外各處餘費多於額稅以致歲款正
項錢糧

命時崇會同巡鹽御史圖爾泰兼理鹽政

上發函章

諭以兩廣鹽政積弊甚多朕已察得陋弊數條著交該撫

查辦十二月時崇遵所

發章內情節疏奏鹽政七條一鹽政衙門歲有羨餘十萬兩向歸鹽政有一種蠹胥名曰發收鹽政初任時任其播弄迨少知事例而一年差期將屆急公之心不勝營私之念徵羨餘而置正課於不問應將此項盡充公用其發收一役應革一鹽政到任卽遣內司承差坐守場口名爲緝私止知勒索致私鹽充斥查緝之責在文武官原無藉內司承差應

革一恤商裕課無過於裁冗員運司職掌兩省餉課應與庫官仍留任任事其知事大使及潮州廣濟橋運同廣惠分司均屬冗員應裁查驗之任責之州府課銀徑解運司一運司向得羨餘六萬兩內應解河工銀萬兩銅斤水脚銀萬兩今鹽政羨餘充公其鹽政名下銅斤水脚萬兩應在運司羨餘項下支解餘三萬兩充公一行鹽地方文武員皆有規例名曰茶果應行禁革再犯以枉法贓治

罪一兩廣場商無力養竈丁不得不售私鹽埠商
不能向場買運民間又不得不食私鹽商人惟買
鹽政大票以爲行鹽護符私鹽盛則官鹽愈滯請
將運使庫銀借給三萬兩每府委佐貳賢員將竈
丁所晒鹽盡行收買鹽價收放責成知府隨賣隨
收官鹽得行課餉自裕一兩廣鹽埠惟運樂與廣
濟橋最大利徒捏商人名色賄鹽政承充總商倚
勢恣私必應禁革令各州縣自募殷實土著具結

保充疏入部議如所請鹽政運司所得羨餘解交
內務府得

旨廣東兵餉不敷此項銀兩卽存留彼處充餉餘如所議
行四十七年三月疏言粵東濱海各州縣倉穀久貯易
於霉爛省城八旗官兵需糧甚多請將近省州縣
存穀酌量多寡折米六萬石運省支用其該年派
撥額米秋成徵補間遇歲歉亦可動用賑濟下部
議行十二月疏言前耿逆之變隨臣父范承謨殉

欽定八旗通志 卷一百九十二
難者五十三人內生員嵇永仁王龍光儒士沈天
成及臣族叔范承譜俱偕臣父幽囚三載殉難死
節經前撫臣楊熙題請

贈銜部以生員無追贈例議寢臣仰祈

皇上特沛恩綸予以一命陪祀臣父祠堂以慰忠魂下部
議生員嵇永仁王龍光應追贈國子監助教沈天
成范承譜雖庶民無追贈例但係死節應追贈國
子監學正并入祠陪祀從之四十八年五月疏言

廣東連州總鹽額引行銷本州及湖廣之桂陽臨
武藍山嘉禾四州縣樂昌總鹽額引行銷本縣及
湖廣之郴州宜章興寧永興四州縣但連樂二州
縣之引多於衡郴八州縣之額以致此壅彼缺請
量勻十分連州樂昌行銷十分之三桂陽郴州等
行銷十分之七又潮州惠州贛州三府俱行銷廣
濟橋鹽此三府所屬平遠鎮平程鄉興寧長樂五
縣額引較多而惠州府屬之龍川和平永安三縣

欽定八旗通志 卷一百九十二 八旗通志 五
及江西贛州府屬十二縣額引獨少不敷民食應
將平遠等五縣之引勻銷於龍川等五縣贛屬
十二縣內信豐龍南定南三縣接壤惠川距潮路
遠難運應就近改食惠鹽又福建汀洲府屬八縣
內長汀一縣額引幾居通府之半應撥銷於寧化
等七縣廣西靈川陽朔義寧三縣鹽引難銷應撥
於易銷之全州灌陽興安三州縣商民均有裨益
部議從之四十九年八月擢福建浙江總督時海

賊鄭盡心在洋肆劫遠至錦州等處兵部檄沿海
各省嚴緝五十年三月時崇緝獲盡心解京四月
疏言兵糧計口授食刻不容緩本年夏秋不敷兵
米萬七千七十餘石請於嘉湖二縣府捐米石內
各移萬石貯省倉以敷兵米下部議行五十二年
五月疏言臺灣所屬三縣年徵稻粟十三萬八千餘
石除折支各營兵米外歲餘七萬石現存六十六
萬三千餘石貯已十年易致紅朽請將新收者勻

留二十萬石備三年兵米之用其四十六萬餘石
出糶給臺灣俸餉從之八月又言閩省福興泉漳
四府一年兩熟本年興漳早禾豐收福州歉薄晚
稻則興泉兩未沾足福州得雨更遲恐來歲青黃
不接時民食可慮請於江浙運米內撥給收貯米
貴平糶得

旨江南運米內速將五萬石運至福建米到日卽行平糶
毋致滯爛五十三年三月

陛見瀕行

賜御製詩有棟梁祖幹家聲重蘭桂孫枝令譽清之句

序云浙閩總督范時崇陛見來京朕每念伊祖爲開創宰

輔伊父乃忠義名臣所以待之優重今因回任特書御

詩餞送五十四年十一月授左都御史五十五年五月

因祈雨不親到經大學士嵩祝奏劾得

旨范時崇著降三級留任革去恩詔所得廕生五十六年

四月授兵部尙書五十八年九月振武將軍傅爾

丹請於莫代察罕、度爾與鄂爾齋、圖果爾各築設
站

特命時崇前往料理五十九年三月回京十月以疾乞休
允之十二月卒

施世綸

施世綸漢軍鑲黃旗人靖海侯琅仲子康熙二十
四年以廕授江南泰州知州二十八年正月以承
修京口沙船遲悞部議降調督臣傅臘塔以世綸

清廉公直題留得

旨留任三月擢揚州知府三十年八月海潮驟漲泰州范
公堤衝塌千九百餘丈民田竈地多沒世綸牒請
捐修二十二年調江寧知府三十五年丁父憂督
臣范承勳以世綸輿情愛戴請在任守制御史胡
德邁特疏言應行離任遂歸連丁母憂歲餘

特旨授蘇州知府仍以終制辭不赴三十八年服闋授江
南淮徐道四十年十月湖南按察使員缺大學士

伊桑阿等以九卿保舉世綸入奏

諭曰施世綸朕深知之其操守果廉但遇事偏執百姓與生員訟彼必護庇百姓生員與縉紳訟彼必護庇生員夫處事惟求得中豈可偏私如施世綸者委以錢穀之事則相宜耳十二月遷湖南布政使先是議遷五開衛署於平屯俾黎平府專城而治四十一年世綸牒稱五開衛界黔粵控蠻彝實爲辰沅靖之藩籬明宣德年間黔省黎平府數被苗患爰飭衛城建府

署

國朝因之自康熙二十七年府衛官弁不和始有遷衛之議平屯僻處一隅不惟建造無資且孤立堪虞若官軍兩遷一旦棄田園壞廬舍必致流離失所若僅遷衛署貢賦出納遙轄最難矧自明迄今府衛同城軍民相安無事請仍舊便議久不決嗣總督喻成龍巡撫趙申喬會疏以

聞

特旨俞允四十一年以衡州府之安仁嘉禾臨武永州府
之江華寶慶府之城步及郴州之桂陽靖州之通
道天柱向止訓導一員請添設教諭又永定銅鼓
二衛止設教授綏寧會同二邑止設教諭俱請添
設訓導

勅部議行四十三年調安徽布政使四十四年遷太僕寺
卿四十五年二月因湖南任內失察兵掠當舖事
罷職三月

特旨授順天府尹疏陳四款一禁五城司坊擅理詞訟一
禁奸徒包攬捐納一禁牙行要佔客貨一禁逐流
娼歌宴

敕部議定爲令四十八年授左副都御史兼管府尹事四
十九年遷戶部右侍郎督理錢法尋調總督倉場
五十四年奉

命巡撫雲南會漕運總督缺員卽以世綸補授先是漕運
俱由瓜洲開行其間下花園港乃糧艘停泊處至

是江溜北趨花園港衝塌百餘丈世綸移咨河臣恐糧艘遲滯權將繞城河開壩行五十九年七月

上諭曰總漕施世綸居官素優歷年漕船俱催趲全完並無遲悞本年漕船已經過淮更無他事漕運印務暫交與河道總督趙世顯署理施世綸速赴豫省將河南府至西安黃河輓運路逕勘明具奏陝西現存穀石數目亦著查奏今陝西正值軍興之際施世綸暫居陝西協同總督鄂海辦理世綸乃溯流上尋求古跡九月疏言

河南府孟津縣至陝州太陽渡大小數十餘灘緯路高低不等或在河南或在河北惟圪把窩魚林漆等處緯路年久間有坍塌其澗池以下水道下水船可載糧三百餘石上水載及其半澗池以上河高迅激僅可輓數十石由砥柱至三門神門本無緯路若小舟乘東南風猶或可上鬼門水勢洶湧土人從未行舟惟人門稍緩石崖鑿有緯路路旁鑿有方眼又有石鼻臣愚以爲石鼻可穿鐵索

方眼可裝木限授手助力觀此則從前輓運跡猶
存自陝州至西安府河水平穩俱有輓運路逕臣
謹繪圖呈

覽又奏河南府至陝州三門現在無船請自河南府至陝
州太陽渡三百餘里用車運計五日可到每車可
裝穀八石計穀二十萬石需車價銀四萬三千七
百五十兩自太陽渡至西安府黨家馬頭河平穩
水運爲便需運費銀二萬六千兩自黨家馬頭至

西安府倉二十里又需車價銀四千兩其貯穀口
袋二十萬餘需價銀三萬兩共計銀十萬三千
七百五十兩總於豫省支銷不令陝西接運但運
穀二十萬石止得米十萬石請令豫省以二穀易一
米起運則運價可省半若慮米難久貯請照例出
陳易新奏入

嘉其詳悉從之十月

上諭曰陝西地方現有軍務又年歲歉收總漕施世綸協

欽定八旗通志 卷一百一十二
同總督鄂海動支倉穀散賑但地方官員大半在軍前辦事之人殊少發帑金五十萬並陝甘常平倉貯穀百三十餘萬石酌量動用派部院司官往賑交施世綸總管六十年四月疏言陝西四月無雨秋成可慮豫省先運米十萬石督臣已借支駐防兵餉所存無幾請促豫省將後運米石運到平糶再撥河南湖廣米各十萬石運至陝西存貯備用部議如所請六月命歸淮安理漕事六十一年四月以病乞休

溫旨慰留令其子廷祥馳驛省視五月卒遺疏入請隨父
琅墓附葬閩省

上允之

諭曰施世綸簡任總漕清慎自持勤勞素著歷年催儻無誤前病請解任方冀調理痊愈以副眷懷忽聞溘逝深為軫惻應得卹典察例具奏尋

賜祭葬如例

施世驃

施世驃漢軍鑲黃旗人靖海侯施琅第六子康熙二十二年隨琅剿海賊鄭克塽委署守備取澎湖及臺灣叙功加左都督銜三十年授山東濟南城守營叅將三十五年二月

上親征噶爾丹天津總兵岳昇飛奏薦世驃隨征召試騎射

命護糧運既至奎素地復隨大將軍馬斯喀追賊至巴顏烏蘭凱旋仍任濟南叅將乞歸福建葬父得

旨施琅久在海疆功績懋著其子施世驃頃隨軍進剿亦効有勤勞准給假葬親事畢卽回任三十七年遷臨清副將四十年擢浙江定海總兵四十二年四月

上南巡

御書彰信敦禮匾

賜之時海中多盜世驃屢出洋巡緝先遣裨將假商船以餌盜擒獲甚衆斬盜首江崙四十六年

上南巡

金定八旗通志 卷一百九十二
詢及擒斬海盜事

溫諭嘉獎

賜戴孔雀翎四十七年擢廣東提督五十一年調福建水師提督六十年四月奸民朱一貴自稱明裔偽號中興王下大元帥聚眾倡亂於鳳山縣之姜藺害臺灣總兵歐陽凱副將許雲叅將羅萬倉遊擊游崇功等遂陷臺灣府治五月丙寅世驃聞報卽率所部進扼澎湖總督滿保檄南澳總兵藍廷珍等

以師會眾議三路進攻世驃謂南路打狗港在臺灣正南南風正盛不可泊北路之清風隙去府百餘里饑運頗艱度賊必屯聚中路宜直搗鹿耳門時臺灣文武官相率退回澎湖惟北路淡水營守備陳策堅守汛地世驃遣遊擊張賊等赴援而自統師指中路選勁卒乘兩小舟載旂幟先伏於南北港六月丙午抵鹿耳門外洋賊據礮臺拒阻世驃登船樓督戰擊鼓發礮中賊貯火藥器火大熾

賊驚潰衆軍齊進兩港悉樹我軍旗幟賊不敢犯
遂揚帆直度鯤身鯤身者海沙也大舟不能過是
日海水驟漲八尺戰艦乘風迅達遂復安平鎮明
日破賊四千於二鯤身辛亥賊悉衆八千來犯復
擊敗之壬子遣守備林亮等由西港進遊擊朱文
謝希賢林秀等越七鯤身由鹽埕大井頭諸路奮
勇登岸並趨府城世驃身先將士指麾布陣賊俱
敗潰一貴竄遁遂復府治復遣叅將林鎮等分路

撫剿閏六月丙寅諸羅縣溝尾莊民楊旭等誘擒
一貴及其黨翁飛虎王玉全張阿三李勇陳印等
以迎叅將林秀縛送世驃軍前賊黨抗拒者先後
擒斬略盡餘衆就撫臺灣南北兩路悉平

上詔部臣優叙有功將士

賜世驃東珠帽黃帶四團龍補服九月世驃卒於臺灣軍
營遺疏言臣父琅昔日蒙

恩葬閩今臣骸骨願得與父相依并留臣幼子隨臣妻守

坐近因剿賊借藩庫銀一萬兩容臣長子雲南知府士岡次子廣東遊擊廷專變產交完疏入得

旨施世驃効力年久勞績懋著沿海水師營務極爲諳練簡任提督實心盡職當臺灣匪類竊發卽調遣官兵親渡海洋屢次大敗賊衆七日內克復臺灣擒獲賊首朱一貴等俾地方寧謐深爲可嘉海疆要地正資料理忽聞將星隕落朕心深爲悼念著贈太子少保察例賜卹所借藩庫銀一萬兩免其償還其安葬福建及妻子留

住之處並照所請行

賜祭葬如典禮諡勇果雍正元年八月兵部議叙克復臺灣功以應否給世職請得

旨臺灣地方自古未屬中國

皇考以聖畧神威取之載入版圖逆賊朱一貴等倡亂佔據臺地

皇考籌畫周詳指授地方官員遣調官兵七日之內剿滅數萬賊衆克復全臺

皇考當春秋高邁威揚海外功德峻偉官兵感戴

皇考教養之恩奮勇攻取甚屬可嘉固不必援引前例後亦不得爲例茲仰副

皇考從優議叙之旨官員現行議叙加功之外著概行各加一等提督施世驃統領大兵徑渡海洋鼓勵將士屢經大戰擊敗賊衆七日之內克復臺灣著給予一等輕車都尉世職尋以其子廷專襲

楊長春 弟長泰

楊長春漢軍鑲黃旗人父廷瑜任杭州駐防協領

從征耿精忠於台州陣亡長春廕八品監生康熙

二十五年授佐領三十五年由中路隨征噶爾丹

管礮有軍功三十八年都統公鄂倫岱奏薦長春

上親揀選以直隸遊擊補用四十一年授京口叅領四十

四年

駕南巡長春以沙船備操

上追念其父陣亡

賜壯節流芳額四十九年鎮海將軍馬三奇奉

旨緝海賊鄭盡心黨與令長春帥兵船出洋搜捕長春由

吳淞出口歷內外洋及江南浙江接壤之盡山花

烏等處抵浙省定海于衢山舟山間獲賊船三賊

五十餘三奇以長春於陸路水路皆諳練奏請授

中軍副將

上允所請五十一年三奇保題長春引

見

親詢出海緝賊情形得

旨嘉獎五十七年調湖廣鄖陽城守營副將五十九年遷

江西南瑞鎮總兵雍正元年

賜孔雀翎二年擢浙江提督

陛見

賜秉心誠悃額並冠服

命長春於浙省道府以下官舉所知者一員奏言臣到浙

未久整飭營伍文員內才幹廉潔者未盡周知不

欽定八旗通志 卷一百九十二
五
敢冒昧陳奏得

旨所奏合宜應如是時長春弟長泰任肅州總兵以長春
授浙江提督具疏謝

上諭之曰汝兄楊長春德勝於才和平忠厚謹慎有餘所
嫌者稍覺偏於善柔雖然武臣中可謂一好提督四年

長春卒

賜祭葬如例諡勤恪長泰由營總於康熙二十九年從裕
親王福全征噶爾丹三十二年授佐領三十六年

由中路隨征噶爾丹四十年授叅領五十年擢西

安左翼副都統五十四年策妄阿喇布坦擾哈密

長泰隨將軍富寧安駐防巴里坤五十六年襲擊

策妄阿喇布坦賊衆於烏魯木齊多俘獲還仍駐

巴里坤下部議叙五十七年任肅州總兵雍正三

年富寧安以策妄阿喇布坦已歸順奏撤巴里坤

等處兵長泰率吐魯番撤回官兵赴肅州汛鎮守

六年授杭州副都統十年五月以老解任尋卒

高其倬

高其倬漢軍鑲黃旗人父廕爵任口北道其倬由康熙三十三年進士改庶吉士散館授檢討尋兼佐領四十一年充四川鄉試正考官四十五年遷右中允尋轉左四十六年遷侍講四十八年提督山西學政五十一年丁父憂服闋補侍讀遷右庶子五十八年轉左五十六年二月遷侍讀學士十一月遷內閣學士五十八年正月以河南南陽

鎮標兵挾忿圍辱知府

命其倬同刑部尚書張廷樞往鞫得實置首犯於法總兵

高成等論罪如律二月丁母憂五十九年授廣西

巡撫六十一年二月署雲貴總督十一月實授雍

正元年九月疏言雲貴兩省土司承襲向有陋規

上下衙門每因文結舛錯藉端需索苦累臣已嚴

行禁革并請嗣後咨部文冊內數字舛錯無甚關

係者免其駁換於疏內代為聲明庶承襲事易結

金定八旗通志 卷一百九十二
措索弊除得

旨嘉獎十一月疏言雲貴魯魁山土目楊方普李四姓糾眾剽掠不聽約束本年十月內其酋方景明等率獮夷數百殺元江獮目施和尚焚其寨臣遣兵分剿擒景明及獮夷三百二十六名分別正法報

聞先是青海台吉羅卜藏丹津肆逆謀侵西藏定西將軍策旺諾爾布檄各路偵禦其倬以雲南邊外中甸阿墩子地方爲進藏要路檄遊擊劉安魁劉國

侯等嚴防並遵

旨令提督郝玉麟以兵二千由中甸進駐察木多副將孫宏本以兵五百赴中甸爲聲援二年二月羅卜藏丹津爲大軍所敗竄準噶爾青海平中甸喇嘛營官番目等携三千五百戶繳偽劄納土歸城其倬疏

聞
上嘉其辦理妥協給騎都尉世職十月貴州狝家苗酋阿

近與弟阿臥倚險作亂其倬以狎家苗聚處定番
廣順二州境其附近苗寨多被迫脅遣人招撫阿
近等勢窘爲官兵所擒疏至

諭部優敘加三級尋請增雲南楚姚鎮兵六百并增鎮屬
景蒙營叅將守備各一千總二把總四兵千卽以
新裁援勦左右兩協弁兵撥補部議從之十一月
條奏中甸善後事宜一中甸開墾商民日增請設
撫番清餉同知及經歷巡檢等官管理一番目舊

有營官神翁列賓名目聽堪布喇嘛指使請給外
委守備千把總劄付聽中甸文武官轄一中甸向
行滇茶請照打箭爐例設引收課由麗江府收報
一中甸沿江數百里及山谷曠土甚多請給牛種
房屋招佃開墾三年後起科供增駐官兵歲糈一
中甸僧衆千餘寺屋數百收藏軍械易於宿奸番
人舊給喇嘛費甚多應裁減除出身西藏之喇嘛
外其本地喇嘛選誠實者二百名咨給度牒餘以

欽定八旗通志 卷一百九十二
次選補器械入官每年量給青稞酥油并銀三百兩爲口糧衣單資至番日受外委劄付亦分別歲給銀兩青稞養贍又條奏營魁山善後事宜一營魁山內通哀牢外界異域須重兵控壓請設普威營置叅將一駐普洱守備二分駐威遠土州及茶山千總四把總八分汛控禦一賊巢全在元江協與新營所轄地新營隸臨元鎮不隸元江協兩界互相推卸悞事請移新營及擬設之普威

營均隸元江協以臨元鎮統轄一威遠土州爲野賊逋逃藪請改土歸流設撫彝清餉同知及經歷并大使巡檢等官分管鹽井地方事務一方姓普姓土職糾衆滋擾請停襲一威遠新開之按板抱母二鹽井歲獲息銀二萬餘兩請充新兵餉一猓目施和尚之姪賦勒等妻子請移住元江府城威遠土官刁光煥子弟家口移省城安置一九龍江口夷人出入處請設汛照山海關例給印票客商

兵役往來一例盤察毋得出境滋事村寨各編里
甲戶口以稽一設義塾數處夷人子弟有志讀書
者入塾誦習于元江府附考額外加取二名一勸
誨夷人墾田請照雍正元年定例旱田十年水田
六年後陞科又條奏貴州苗疆事宜一定番廣順
頑苗皆就擒請於西猛設汛調定廣營千總駐防
一定番廣順二州路通廣西泗城土府請於青箬
斷杉樹二處設汛衛行旅一請改大定鎮爲協裁

中營遊擊以左營兼中營仍守大定移中營守備
一千把總各一分防廣順州所屬長寨遮貢安順
府所屬十三枝普定縣所屬五枝等處移把總一
防羊城堡統歸定廣協轄至都勻府屬之獨山州
接廣西南丹土州苗姓尤頑請移都勻守備駐防
一黔省境連川楚奸人勾結掠販人口爲害請定
例地方官一年內分別拏獲人數議叙其不能查
緝爲他處獲者亦照人數議處客民有買貧民子

女者報官用印不得至四五人違者照興販科斷
一點省與楚蜀滇粵接壤請定例夷人越界拏送
本省滋事者即於其地審辦又黔省有拏白放黑
之習被人劫殺力不能報將無干之家奪其人畜
暗插冤單令其轉為報仇否則索贖請加應得罪
一等一土司等貧困不支往往以有糧田詭稱無
糧售與紳衿商民買主收無糧之租土司納無田
之賦久之完納無資或派令屬苗代完請徹底清

查令執業者輸納又土司下設立權目人等報明
有司後有事發併懲一點地潮濕倉米易朽請核
計兵米存二年之蓄餘於春夏減糶著為例一黎
平府與楚省五開衛同城民苗雜處分隸兩省請
改五開衛為縣隸黎平銅鼓衛亦歸併五開古州
八萬等苗疆均屬黔省事權歸一又言向來雲貴
兩省拔補千總把總皆以本營之兵補本營之缺
伏思同為兵丁一旦難以約束即同輩千總亦羣

非笑其不肖者則又獲庇兵丁將備稽查不易為力請嗣後拔補本營時即於外營對調不必仍留本營

詔並如所請三年二月加兵部尚書銜五月疏言近聞策妄阿喇布坦萬里効順籌度經久之計正在此時臣以為兵宜酌減備未可全撤西路形勢臣所知至阿爾台一路臣曾運米二次自殺虎口出經蒙古各部落約三四千里大兵駐劄極邊甚有關係

似宜兵數量減米數微增則遠戍倍加踴躍

上嘉納之六月晉太子少傅十月調福建浙江總督其倬以雲南鶴慶府鄧川嵩明騰越三州太和浪穹二縣土軍丁賦係明嘉靖萬厯間因夷人作亂暫撥民人協防隨立太和所鳳梧所名目每丁徵銀一兩伊等既納民賦於本籍又輸軍賦於防所相仍未革疏請豁除

允之四年抵閩浙總督任疏言福興漳泉汀五府地狹人

稠自平定臺灣以來生齒日繁山林斥鹵之地悉成村落多無田可耕流爲盜賊勢所不免臣再四思維惟廣開其謀生之路如開洋一途前經嚴禁但查富者爲船主商人貧者爲頭舵水手一船幾及百人其本身既不食本地米糧又得沾餘利以養家屬若慮盜米出洋則外洋皆產米地慮透漏消息則今廣東船許到外國豈福建獨慮漏洩慮私販船料則中國船小不足資彼之用以臣愚見

開洋似於地方有益請弛其禁

詔下怡親王會同大學士九卿議行五年四月疏言臺灣水沙連等社兇番自朱一貴作亂後不納餉賦肆行焚劫臣令臺廈道吳昌祚同知王沂叅將何勉等率弁兵番壯分路裹糧進剿擒首惡骨宗等二十名各社相繼歸誠報

聞十月以李衛爲浙江總督

命其倬專管福建總督事六年二月條奏福建鹽政事宜

其時一謹產地之收曬閩省鹽場福清最大請做保甲
法添設團長甲長查報日曬之鹽設總倉封鎖以
杜私賣且免雨水之患修砌莆田各團涵窟以資
防護一嚴銷地之售賣閩鹽向係商行後改官運
近用水客肩販請暫令水客認銷而以官運接濟
三年無悞報部充爲商人再發引以立成法場鹽
多產之時仍照官運例動課收積一定鹽課之額
數閩省鹽課有額徵公費二項請照定數作正額

其溢行之鹽所獲銀數造爲盈餘報查除支給鹽
道各衙門公用外餘造冊奏銷解部水脚卽於長
價等項內撥納一酌辦理之人員閩省舊設鹽務
各官雍正二年裁汰請嗣後於佐雜官內遴辦無
庸另設下部議行六月以原任山西道御史蕭震
於康熙十三年遭耿逆之變與原任邵武府知府
張瑞午等合謀討賊事洩身殉妻妾媳婢同時死
節瑞午業蒙卹典而震獨遺疏請入鄉賢祠致祭

旌其門

詔如所請七年六月因與臺灣革職知縣周鍾瑄濫致書

札又未審出加徵耗穀各實情部議革職

命降三級留任尋疏言閩省戰船多係平臺灣時所獲長

濶不稱請酌定丈尺隨時更改閩安協左營之船

多鐵板沙線請改爲平底以適進哨之用又請改

福建同安泉州長福邵武四營遊擊爲叅將增設

灌口安海二汛守備各一移泉州府糧捕通判駐

安海汛連江縣守備駐東岱汛移東岱汛千總駐

可門汛部議從之閏七月來京

陛見

御製詩

賜之有操凜冰霜功帶礪匡時重鎮眷良臣之句八年二

月晉太子太保四月回任先是

上以其倬通曉堪輿術

命詣

金陵入道志 卷一百九十二
福陵恭視形勢工程其倬奏言

陵前左畔水法因夏日溢流稍更故道弓抱之勢微覺外

張必須順導河流方稱盡善至是大學士等議如

所言所奏濬修五月調兩江總督復

命來京六月疏叅巡臺御史李元直任性滋事狀下部察

議元直降三級調用九月以其倬隨怡賢親王允

祥相度

萬年吉地於易州境內泰寧山太平峪

特授一等輕車都尉世職併前所得騎都尉爲三等男

諭曰高其倬歷任封疆其樹績建勲揚名垂譽者不可悉

數原不以此爲宣力見長之地乃能悉心籌度務期萬

全無一毫瞻顧推諉實出於一片忠愛至誠之悃不僅

才識超羣已也是月

命署雲貴廣西總督九年疏言雲南昭通府四面環山請

委員專辦墾務定爲水旱生熟四項分給兵民墾

土各戶墾種按年收穀還本後起科輸米以省兵

金定人方通元 卷一百九十二
米運費下部議行十一年正月
命仍回兩江總督任會雲南普洱府屬思茅土把總刁與
國勾苦葱蠻煽元江夷攻普洱府城通關大寨擺
夷復附苦葱蠻過阿墨江犯他郎地方其倬檄提
督蔡成貴等分路進剿擒其酋並賊屬五百餘斬
級甚多疏至報

閏九月

命以總督銜管江蘇巡撫事十二年以瞻徇知縣趙峴瑄

承修海塘工程賠項部議降調尋授江蘇巡撫十
三年疏奏淮關監督年希堯庇縱玷職

詔嚴鞫削希堯職乾隆元年正月以疾

召還京四月授湖北巡撫尋調湖南二年七月以湖南
城步綏寧二縣徭糾黨焚劫其倬偕總督史貽直
遣兵分剿賊黨悉平

諭部優叙加三級三年三月擢工部尙書尋調戶部十
月卒於寶應舟次遺疏入

諭曰高其倬練達老成宣力年久今聞溘逝深爲悼惜
著沿途官弁護送回旗尋

賜祭葬如例謚文良

郝玉麟

郝玉麟本漢軍鑲白旗人由驍騎校於康熙三十
四年授門千總四十四年遷守備累遷雲南援剿
協副將六十一年擢鶴麗鎮總兵雍正元年九月
授雲南提督八月青海羅卜藏丹津脅衆台吉叛

劫親王察罕丹津掠青海諸部官兵分路進剿

詔玉麟率兵赴中甸駐劄揚威塞外中甸故屬麗江後爲
青海番所據受羅卜藏丹津僞劄玉麟至宣布

恩威皆畏服上所受僞劄率衆三千五百戶男婦萬七千
餘投誠納土玉麟安撫夷民清釐戶口請於中甸
駐兵千阿墩子爲扼吭地駐遊擊一兵五百

詔嘉其料理合宜頗著勞績俟青海事竣後下部議叙二
年正月奉

命自中甸進駐察木多招撫夷七百餘戶四月青海平叙
功授雲騎尉世職五年三月鎮沅夷不法焚署竄
囚玉麟同總督鄂爾泰發兵分勦擒首惡置之法
夷民漸復業事

聞

諭嘉玉麟公忠爲國能鼓勵弁兵奮勇報効六年二月茶
山所屬夷民劫客商拒捕傷官玉麟同鄂爾泰調
兵進勦擒首逆安撫餘黨後以車里土舍刁正彥

狡詐煽惑夷民欲擒治正彥聞風潛逃玉麟於猛
腊生擒之由猛崙慢林至思茅普洱元江一帶親
勘以茶山柔延千餘里普洱思茅爲咽喉九龍江
橄欖壩爲藩籬與交趾莽子老撾毘連更有慢達
等五渡口緊要且幅員遼闊宣尉司刁金寶不能
兼顧土產普洱茶外有鹽井厥務必劃明界址設文
武官彈壓列疏入奏得

旨嘉獎五月部議茶山功授玉麟都督同知九月烏蒙所

欽定八旗通志 卷一百九十二
屬大關米貼土婦陸氏作亂玉麟遣兵剿獲陸氏
及賊黨設塘汛十二月刁正彥餘黨作亂玉麟領
兵二千進攻追擊至橄欖壩渡整哈江奪渡口又
率遊擊郭佑民徐成貞等夾擊賊大敗擒逆黨招
撫夷民五百餘戶

上嘉其辦理妥協七年正月以雲南慶雲見

特旨授玉麟騎都尉世職三月授廣東總督九月奏言廣
州府屬香山廣海新會交界傍海依山多巨盜嚴

飭水師巡哨於香山三虎海面見賊船七追至廣
海獨涯清水灣海面戮盜犯及傷溺者二十餘人
擒賊首李奕揚夥盜楊亞干等二十六人汛供積
盜有陳大樂王亞七梁國柱現搜捕務獲

諭曰此案非尋常獲盜可比所有將弁照軍功例議叙又
奏查出粵東官運官銷之埠羨並各商請按引增
課每年六萬兩請帶銷舊引以三年爲滿諸疏入

諭曰觀汝所奏無非以清楚錢糧爲要務不特輕重本末

欽定八旗通志 卷一百九十二
失宜粵省民情惟利是趨似此亦不甚相協果能令吏
治潔清民情淳樸自漸臻弊絕風清若不於根本處著
力而逐末辦理豈但不勝其繁亦何有吏畏民懷之期
耶八年正月奏移廣東定海縣青崖司巡檢駐太平汛
儋州安海司巡檢駐薄沙汛崖州抱歲司巡檢駐
安樂汛添設瓊山縣水尾司巡檢一萬州寶府司
巡檢一裁儋州倉大使一瓊州府司獄一從之三
月奏言訪得逸盜王亞七陳大樂潛聚新會縣北

峯黃陽各山梁國柱匿新會縣古兜山已檄弁兵
分獲其夥黨李亞三張亞八余文禮等亦就擒查
新會縣北峯南峯二山向有柴場一汛於香山新
會廣海三營每年輪撥官兵駐防今久廢請照向
例防守

上嘉允之五月奏言廣東肇高廉羅道駐肇慶府控制千
里外之高廉二府雷瓊道所轄雷州府在海北瓊
州府在海南俱鞭長莫及請增設巡道一駐高州

欽定八旗通志 卷一百九十二
分轄高雷廉三府改肇高廉羅道爲肇羅道雷瓊道爲海南道並請將高雷廉道海南道及舊惠潮道俱加兵備銜六月又奏改廣東營制事宜一移左翼鎮標右營遊擊駐蘆苞口汛一改新會營遊擊爲叅將增守備千總各一把總四兵六百七十七與原設者分左右二營隸叅將管轄一增河頭汛都司千總一把總二兵四百兼防甕崗石窩龍遙各汛歸羅定協統轄一龍門營改隸增城管轄

改增城營遊擊爲叅將一抽調廉州營把總一兵九十再募兵三十歸化石營一改崖州營遊擊爲叅將增千總外委各一兵百十八一移原防市橋之虎門協都司駐南村並移番禺縣縣丞同駐一廣州春江二協以副將專管毋庸隸左翼鎮標並增廣州協千總外委各一兵一百四十五一左右翼鎮標五營及增城營俱無守糧應改戰爲守與通省畫一并增右翼鎮標兵三百四十五一增香

山縣縣丞一駐前山寨調原駐之守備於縣城八月請增吳川縣碭州巡檢一九月請復設潮陽縣縣丞十一月請增潮州鹽知事一俱如所請行九年四月奏言海豐縣之甲子捷勝二所應改置一縣於東海窖建縣治設知縣典史各一移海豐縣訓導爲新設縣訓導改原駐東海窖千總爲新設縣城守營千總東海窖巡檢爲甲子城巡檢汕尾巡檢爲黃沙坑巡檢俱隸新設縣轄又奏言新會

開平兩縣界地名大官田距縣治遠請增置一縣設知縣訓導典史各一分新會藥逕司巡檢隸新設縣轄俱下部議行尋定東海窖新設縣曰陸豐大官田縣曰鶴山又奏裁澄海縣河泊所大使改設樟林鎮巡檢一裁平海大城海安大鵬雙魚五所改設平海所巡檢一增新安陽江二縣縣丞各一駐大鵬雙魚二所城裁陽江縣太平驛陽春縣樂安驛驛丞於太平地方設巡檢一十月請改化

石營守備爲都司瓊州與寧和平確州東莞三水
四會那扶等營守備爲都司十二月奏言長寧縣
之老虎坳及錫場山翁源縣之磔下鄉各設汛一
設外委把總駐防又請增磔下鄉巡檢一俱下部
議行又奏言瓊州鎮孤縣海外產米少又龍門香
山虎門廣海等處兵民稠集商販罕到均應預籌
積貯請將鹽政節省銀買穀萬六百石分貯各營
春借秋收免加息部議從之十年二月

命署福建總督時臺灣大甲西等社兇番不法玉麟赴廈
門料理同提督王郡遣兵進剿旋撲滅

上嘉其悉心籌畫調度有方下部優叙加三級十一年三
月奏言福清縣依山傍海當孔道其地駐長福營
額兵不敷調遣請於通省各營撥防八月奏臺灣
營制事宜一府治增城守營設叅將一守備千總
各二把總四兵千一南路原設叅將一守備一千
總一把總四兵千不敷分防請改山猪毛口守備

爲下淡水營都司增千總一把總二兵五百合原
設弁兵分駐山猪毛口及觀音山石井等處一北
路原設叅將一守備一千總二把總四兵千一百
二十亦不敷分防請改叅將爲副將增都司一守
備一千總四把總八兵千二百八十分中左右三
營以都司爲中營守備爲左右二營分駐諸羅縣
治彰化縣治及斗六門淡水等汛一安平地方外
控海洋內扼臺郡請設礮臺七并造倉貯粟三萬

石資兵餉一臺屬田畝丁口漸增請將莊民編保
甲並設社學教導一臺屬流寓有從前隨征効力
者請給外委功加劄付卽委爲社長約束居民三
年無過准與內地兵以把總相間用一臺灣總兵
有統馭民番之責請照山陝沿邊例改爲掛印總
兵官十一月奏言福州屬南台居民輻輳舊設巡
檢千總各一不敷彈壓請移福州海防同知及福
州協都司往駐十二月奏改督標水師遊擊爲叅

將十二年二月奏改建寧協副將爲總兵轄延平
一協楓嶺一營三月又請移漳州鎮標守備駐南
勝五月奏酌核海疆情形增改府州縣各事宜一
福寧地衝要直隸州不足彈壓請改爲福寧府設
知府通判經歷教授各一增置附郭縣設知縣訓
導典史各一同原轄之福安寧德二縣併建寧府
屬之壽寧縣統歸管轄一福州府屬古田縣地寥
闊請於雙溪建城增置縣設知縣訓導典史各一

仍隸福州府管轄一泉州漳州二府俗悍才地廣
請改泉州屬永春縣爲直隸永春州隸以德化大
田二縣漳州屬龍巖縣爲直隸龍巖州隸以漳平
寧洋二縣設直隸州知州州同吏目各一改教諭
爲學正部議均如所請尋定福寧府新設附郭縣
曰霞浦古田分設縣曰屏南六月奏改南安仙遊
寧化三縣驛丞爲巡檢仍管驛永春仙遊各增巡
檢一裁順昌縣仁壽巡檢改設縣丞又改福建糧

儲道爲分巡糧驛道鹽驛道爲鹽法道專管鹽政
兼理福廠船工諸疏俱下部議行七月

命來京陛見奉

旨入鑲黃旗十月

上以玉麟才具精神足以貫注閩浙二省仍照舊制授爲
閩浙總督十三年三月奏請於臺灣府大東門小
南門各設營防南水門北小門各建大礮臺并增
敵樓南路之茄藤港北路之蚊港等處各設礮臺

府西南一帶礮臺空隙處各設木柵資捍禦六月
奏南澳洋面島嶼岐雜歸海壇金門兩鎮分巡鞭
長莫及請以南澳左營銅山洋汛俱改歸南澳鎮
巡查並請撥金門鎮巡船二歸南澳如所請行七
月奏言臣遍歷海寧等縣東西塘並至尖山勘石
壩工見塊石塘及草塘均宜急修卽飭員估奏適
風潮坳卸者十之八九照舊暫用塊石柴草搶修
但欲垂久遠應照內大臣海望等所估改建石塘

金定入加通志 卷一百九十二
奈諸臣意見不合每事齟齬將來興舉大工自必
更致參差臣受

恩深重何敢顧避嫌怨知而不言除堵築尖山石壩工程
已三分之二其現議海塘工程請

旨另簡賢能大員總理

詔嘉所奏爽直九月奏言浙省山海交錯凡要衝處居民
稠雜當增員料理請於常山之草萍鎮西安之全
旺臨海之前所天台之平頭潭太平之松門衛瑞

安之大密衛平陽之蒲門會稽之曹娥壩仁和之
塘棲鎮俱增巡檢一仁和錢塘縣各增主簿一專
管江塘水利從之乾隆元年二月

諭玉麟以閩浙總督銜專管福建事先是臺灣彰化縣
勦滅之牛罵等三社田畝奉

旨仍歸番民管業部議以番人界內典賣漢人之地畝若
民人往耕兩界錯綜難免侵擾應令該督議還歸
結使民番兩界劃然至是玉麟以台地向係番民

雜處漢民耕種之地半係番黎契賣而流寓不下
數十萬人現耕番地數十萬畝若令歸還不但原
價難追且番黎無力拋荒熟地而漢民無田可耕
請將現在民番所耕地查明四至註冊存案嗣後
永不許民買番業部議從之三年五月奏言閩省
人多田少民食不敷上年福州等府被災奏請截
留浙漕十萬石并委員赴江南等省買米接濟奈
未及月餘浙漕糶完兵民日食仍不敷請於江南

買回米內酌糶再撥藩庫銀十萬兩赴江廣等省
採買並請

救撥江西倉穀二十萬石湖南十萬石運閩以濟窮黎
得

旨允行九月

諭玉麟仍兼管閩浙兩省事四年三月奏言閩省偶遇
歉收兵丁每虞艱食沿海各鎮已有儲穀其餘各
營計兵一名貯穀二石共六萬一千六百石請以

節省生息銀採貯於兵食有濟六月又奏閩省沿海鹽場離郡縣甚遠曬丁待食常平倉穀每艱輓運查閩省辦課有匿報鹽斤等弊按所犯酌罰陸續買穀萬石檄鹽道於曬丁最多離城最遠之福清場貯穀五千石蒲田場貯三千石餘各場視可以建倉處次第經理諸疏入俱得

旨嘉獎七月擢吏部尙書十一月

命署兩江總督先是

上聞福建漳州府知府王德純居官劣蹟

敕革職令署福建巡撫王士任秉公嚴審至是御史朱

續焯奏言風聞現審未結事如王德純一案有與督撫關涉處

上命續焯馳驛赴閩會同總督德沛及士任查審尋會鞠德純婪贓屬實合疏具奏續焯又以會鞠時士任袒護王麟欲出其罪心多欺詐具摺另奏

詔革士任職並以王麟身爲總督於貪婪不法之王德

純不行糾叅且題陞知府又以才情敏練辦事實
心保薦

敕部嚴加議處部議降五級調用

諭曰朕命德沛確查郝玉麟曾否收受王德純賄賂今

據奏郝玉麟止於每年收受王德純禮物並未受賄

郝玉麟係

皇考簡用之大員久歷外任人亦諳練若照部議降調尙
屬可惜著從寬降二級調用五年補刑部右侍郎六

年二月因病乞休

上允之九月署閩撫策楞叅奏延建邵道鄂善交結玉

麟家人郭姓各款

上命草鄂善職並將玉麟家人嚴審得實玉麟草職十

年三月卒

范時捷

范時捷漢軍鑲黃旗人大學士文程之孫康熙三
十四年襲一等子兼管佐領二十六年授叅領由

寧夏運米至噶多立軍功議叙一等三十八年授
廣東南雄副將四十一年六月調廣西潯州副將
七月遷廣東韶州總兵四十二年調瓊州總兵四
十七年調陝西寧夏總兵先是鄂爾多斯王松阿
喇布請於察罕托輝之地暫行遊牧許之五十二
年八月時捷疏言察罕托輝係版圖內地今蒙古
遊牧多越界與寧夏民相混於體制不便請以黃
河爲界

上曰前松阿喇布以察罕托輝水草佳茂懇請暫行遊牧
並未有令永遠遊牧之旨著理藩院查明具奏尋議如
時捷所請五十七年署甘肅提督雍正元年四月
署陝西巡撫九月實授二年十月疏請裁潼關榆
林靖邊等衛守備千總及教職等缺移華陰縣丞
駐潼關各衛所錢糧歸併附近州縣管理生童歸
該管州縣考試潼關應支兵糧就近改撥潼商道
收支從之十一月來京三年三月授鑲白旗漢軍

都統五月疏劾川陝總督年羹堯欺罔貪婪五款
一運米至軍前侵蝕腳價銀四十餘萬兩一管理
駝米勒取私費三十萬兩一違

旨派勒屬員捐俸興工一與將軍督撫文書擅用令諭直

書官名一保舉題補各官多營私受賄又劾東河

運使金啟勳附年羹堯生事擾民啟勳逮下獄治

罪年羹堯罷為杭州將軍詳見年羹堯傳五年六

月兵部叅奏時捷等引

見人員班行不整應革職

諭曰范時捷乃年羹堯門下鷹犬年羹堯稱其才品超羣

滿漢官員無與比並及年羹堯事敗其案內牽連范時

捷之處甚多朕俱不行究問且念其為勲臣之後仍畀

以都統重任料伊自必感朕深恩力圖報効乃歷年以

來見其辦事昏庸奏對糊塗并無絲毫効力一事可取

之處揣范時捷之意或以朕處治年羹堯之故觖望於

心不肯黽勉亦或才具本屬不及向因工於諂媚故年

羹堯揄揚太過乃至今日底裏畢現耶范時捷著草去
都統在侍衛上行走朕非因偶爾失儀一節處分大臣
也八年正月授散秩大臣總理

陵寢事務七月時捷兄時繹因協理河東河務誤工革職

十月以時捷署古北口提督

諭曰范時捷係開國名臣范文程之孫乃不念國家培植
之恩并不思祖宗積累之厚其在陝西爲官時甘心出
年羹堯之胯下諂媚逢迎以至辱身賤行爲人所鄙笑

朕令其來京辦理旗務而伊志氣昏庸委靡不振無心
爲國家出力是以降爲侍衛以示懲戒繼因

陵寢地方辦理需人將伊命往今范時捷獲罪罷黜范氏

子孫竟無現居六員之人范時捷尙非棄才可比是以
令其管理古北口提督事務觀其如何改過自新一洗
從前之媿耻直隸總兵官俱聽范時捷節制十二月調

署陝西固原提督九年正月寧遠大將軍岳鍾琪
奏甘肅固原肅州兵丁撥二千人出口內地應募

欽定八旗通志 卷一百九十二
補固原召募之事令時捷辦理四月協辦西寧總
兵官事六月署大通鎮旋仍署西寧總兵十年六
月奏修西寧鎮邊牆

命興工督修乾隆二年九月偕西寧辦事大臣保祝奏請

多倫尼託克圖例交馬價准作次年正賦

上是之聞九月因患病奉

旨來京以散秩大臣行走俾得調理三年四月卒

欽定八旗通志卷一百九十二

